

ÍNDICE

PREÁMBULO	1
CAPÍTULO I. DISPOSICIÓN XERAIS	2
ARTIGO I. DEFINICIÓN	2
ARTIGO II. OBXECTIVOS XERAIS	2
ARTIGO III. FUNCIÓN DO CONSELLO	2
ARTIGO IV. FUNCIÓN DO CONCELLO DE CEDEIRA	3
CAPÍTULO II. COMPOSICIÓN, ESTRUCTURA ORGANIZATIVA E FUNCIÓN	4
ARTIGO V. COMPOSICIÓN DO CONSELLO LOCAL DE INFANCIA	4
ARTIGO VI. FUNCIONAMENTO DO CONSELLO	6
ARTIGO VII. COMUNICACIÓN E DIFUSIÓN	6
ARTIGO VIII. CAUSA DE BAIXA NO CONSELLO	7

PREÁMBULO

A Constitución española de 1978 establece a obriga dos poderes públicos de asegurar a protección social, económica e xurídica da infancia, destacando a especial protección daquelas nenas e nenos que se atopan nun contexto ou situación de particular vulnerabilidade.

Igualmente, a Convención dos Dereitos do Neno de Nacións Unidas, do 20 de novembro de 1989, e ratificada por España o 30 de novembro de 1990, marca un antes e un despois no recoñecemento das nenas e dos nenos como suxeitos de dereito. Isto é, como cidadáns e cidadás que teñen dereitos, liberdades, deberes e responsabilidades que cómpre protexer e promover desde as diferentes instancias da sociedade.

A Lei 8/2021, do 4 de xuño, de protección integral á infancia e a adolescencia fronte á violencia, coñecida como LOPIVI, insta ao conxunto de axentes sociais, desde a Administración Pública, aos centros educativos e familias, por citar algúns exemplos, a traballar contra a violencia que poden sufrir as persoas máis vulnerables, as nenas e os nenos. Do mesmo xeito, establece o marco referente para garantir a protección das persoas miúdas e favorece un escenario de traballo a prol dos seus dereitos.

Finalmente, o compromiso establecido no I Plan de Infancia e Adolescencia do Concello de Cedeira, facilita unha folla de ruta para que a participación das nenas, dos nenos e da adolescencia da vila sexan protagonistas na defensa dos seus dereitos máis básicos como cidadáns e cidadás.

Este regulamento establece as bases que rexerán a participación infantil e adolescente a nivel municipal, co obxectivo de facilitar o traballo do Consello Local de Infancia e Adolescencia como órgano fundamental para a diagnose de necesidades e o establecemento de liñas de actuación prioritarias naqueles asuntos que afectan á vida das nenas, dos nenos e da adolescencia cedeiresa.

CAPÍTULO I. DISPOSICIÓN XERAIS

ARTIGO I. DEFINICIÓN

O Consello Local de Infancia e Adolescencia (CLIA) é un espazo de participación infantil directa e activa no marco do goberno municipal do Concello de Cedeira.

ARTIGO II. OBXECTIVOS XERAIS

O CLIA de Cedeira establécese tendo en conta os seguintes obxectivos xerais:

1. Crear unha canle de comunicación entre as nenas, os nenos e a adolescencia do municipio e o goberno local.
2. Valorar as aportacións realizadas pola infancia e a adolescencia en relación a temáticas ou problemas que lles afectan.
3. Propoñer ao goberno municipal medidas de actuación que garantan o benestar das nenas, dos nenos e da adolescencia do municipio.
4. Participar no seguimento e na elaboración de Plans de Infancia e Adolescencia a nivel municipal.
5. Sensibilizar ao conxunto da sociedade sobre a importancia de que as nenas, os nenos e adolescentes teñan voz e capacidade de decisión naqueles asuntos que lles afectan.
6. Difundir os contidos da *Convención sobre os Dereitos do Neno*, que pasamos a chamar *Convención dos Dereitos da Infancia* no marco do traballo do CLIA de Cedeira, favorecendo unha linguaxe inclusiva e non sexista.
7. Favorecer procesos locais de participación directa das nenas, dos nenos e da adolescencia do municipio.
8. Traballar de forma transversal, en todas as actuacións do CLIA de Cedeira, desde un enfoque integrador da igualdade entre mulleres e homes, a non violencia e o respecto á diversidade.

ARTIGO III. FUNCÍONS DO CONSELLO

O CLIA de Cedeira configúrase tendo en conta as seguintes funcións no desenvolvemento da súa actividade:

1. Representación da voz das nenas, dos nenos e da adolescencia do municipio ante o goberno municipal.

2. Identificación de necesidades, problemas e malestares que afectan de forma especial á poboación miúda do Concello de Cedeira.
3. Sensibilización sobre os dereitos da infancia e da adolescencia, con especial atención a aqueles colectivos que se atopan nunha situación de especial vulnerabilidade.
4. Participación en asuntos de interese público e xeral que afectan á veciñanza cedeiresa.
5. Seguimento e aportacións aos plans de infancia e adolescencia aprobados a nivel municipal.

ARTIGO IV. FUNCÍONS DO CONCELLO DE CEDEIRA

O Concello de Cedeira asume entre as súas funcións as seguintes tarefas:

1. Facilitación dos medios humanos e materiais que se estimen necesarios para o adecuado funcionamento do CLIA de Cedeira.
2. Información ás persoas que integran o CLIA das diferentes actividades e medidas das que poden tomar parte.
3. Resposta ás propostas e demandas realizadas desde o CLIA de Cedeira.
4. Promoción de plans de infancia e adolescencia para guiar a actuación do goberno municipal en materia de dereitos e protección das nenas, dos nenos e adolescentes.

CAPÍTULO II. COMPOSICIÓN, ESTRUTURA ORGANIZATIVA E FUNCIONES

ARTIGO V. COMPOSICIÓN DO CONSELLO LOCAL DE INFANCIA

O CLIA de Cedeira esta composto pola seguinte estrutura de participación:

- ∞ PRESIDENCIA. Será a persoa titular da Alcaldía do Concello de Cedeira quen teña este cargo, podendo delegar a presidencia na Concellaría que a tal efecto determine.
- ∞ VICEPRESIDENCIA. Será titular unha persoa que traballa como técnica a nivel municipal, cuxas funcións están relacionadas con cuestións relativas á infancia e a adolescencia.
- ∞ VOGAIS. Grupo máximo de 30 nenas, nenos e adolescentes representantes do municipio.
- ∞ REPRESENTANTES DOS CENTROS EDUCATIVOS. Tanto o IES Punta Candieira como o Ceip Nicolás del Río contarán con profesorado representante ante o municipio no marco do CLIA.
- ∞ REPRESENTANTES DAS ANPAS "O BECO" E "PICAPEIXE". As Asociacións de Nais e Pais activas no municipio contarán con unha persoa representante a nivel municipal no marco do CLIA.

PRESIDENCIA. Exercea pola persoa que teña responsabilidade na Alcaldía ou na concelleira ou concelleiro que determine a tal fin. As súas funcións son as seguintes:

- a) Convocar, presidir e moderar as reunións do CLIA.
- b) Propor a orde do día das sesións.
- c) Garantir a participación das nenas, dos nenos e da adolescencia do municipio.
- d) Coordinación a relación do CLIA cas diferentes concellaría do goberno municipal.

VICEPRESIDENCIA. Será exercida pola persoa titular da concellaría relacionada con temas de infancia e adolescencia e suplirá á presidencia nos casos de ausencia, ou asumindo as súas funcións por delegación.

SECRETARÍA. Corresponde ao persoal técnico municipal designado, e con responsabilidades en temáticas afíns á infancia e a adolescencia. As súas funcións son as seguintes:

- a) Enviar as citacións coa orde do día, a instancias da Presidencia, ás persoas que integran o CLIA.
- b) Levantar acta das sesións, trasladar acordos e expedir informes.
- c) Garantir a comunicación entre as persoas que integran o CLIA.
- d) Cantas outras sexan encomendadas desde a Presidencia para garantir o correcto funcionamento do CLIA.

VOGAIS. Nenas, nenos e adolescentes, que teñen entre as súas funcións:

- a) Recibir en tempo e forma as citacións para as reunións do CLIA.
- b) Asistir ás reunións e exercer o seu dereito a voto.
- c) Expresar opinións, propostas e información das actuacións que están levando a cabo.

SELECCIÓN DE VOGAIS

O CLIA de Cedeira está integrado por alumnado de 5º e 6º de primaria do Ceip Nicolás del Río, e por alumnado que cursa o Ensino Secundario Obrigatorio (ESO) e FP básica do IES Punta Candieira.

A elección das nenas, nenos e adolescentes será polo período de 1 ano, coa posibilidade de estender unha prórroga por outro ano máis. Unha vez pasados 2 anos, no caso de existir novas solicitudes de ingreso, as persoas con maior antigüidade cederán o seu posto no consello. De non existir esa demanda, poderán prorrogar anualmente co límite da maioría de idade, momento no que cesarán a súa actividade no CLIA de Cedeira. En todo caso, o CLIA renovarase cando se estime oportuno, co propósito de garantir a continuidade, o funcionamento e o traspaso de competencias entre a poboación infantil e adolescente.

A súa elección será democrática e realizarase nos centros educativos tomando como referencia de representación o grupo/clase. Para que as persoas seleccionadas podan exercer, de forma efectiva, o seu dereito de representación

no marco do CLIA cómpre presentar unha autorización por escrito asinada por quen teña a patria potestade ou garda e custodia.

ARTIGO VI. FUNCIONAMENTO DO CONSELLO

O CLIA convocarase de forma ordinaria 2 veces ao ano (plenos municipais) e de forma extraordinaria cando así se estime oportuno e así o solicite por escrito ou vía dixital (incluído correo electrónico) un mínimo de 1/3 das persoas representantes.

As reunións ordinarias convocarásen con 10 días de antelación e as extraordinaria poden ser convocadas en 48 horas.

Os acordos adoptaranse por maioría simple. En caso de acontecer empate no resultado das votacións, o resultado da votación recaerá no voto de calidade da presidencia. Na convocatoria das reunións procurarase que estas teñan lugar en datas e horario que facilite a asistencia das nenas, dos nenos e adolescentes que actúan en representación da infancia e adolescencia do municipio.

O consello traballará en dúas vías:

- a) Comisións de adultos con competencias na materia, en xeral, representantes da comunidade educativa do municipio. Neste caso, poderanse propoñer mesas de traballo a nivel técnico para abordar temas de interese e preocupación a nivel municipal en relación á infancia e á adolescencia.
- b) Comisións de nenas, nenos e adolescentes, en grupos de participación, con unha reunión trimestral. Nas sesións traballarase de forma lúdica e adaptada á súa idade, os diferentes temas que se traten no marco do CLIA. De igual forma, poderáselles presentar os proxectos municipais vixentes ou previstos para que expresen a súa valoración ao respecto e podan facer as súas achegas.

As rapazas ou rapaces que abandone o CLIA por cumprir a maioría de idade, poden continuar a súa participación avanzando cara un Consello da Xuventude ou de forma activa no tecido asociativo local.

ARTIGO VII. COMUNICACIÓN E DIFUSIÓN

O CLIA buscará darlle difusión as diferentes iniciativas que xurdan no seu marco a través dos medios ao seu alcance para chegar ao conxunto da poboación cedeiresa. Por parte do Concello de Cedeira, manterase informado ao CLIA de

todos cantos temas podan ser considerados de interese para as nenas, os nenos e a adolescencia do municipio.

ARTIGO VIII. CAUSA DE BAIXA NO CONSELLO

Será motivo de baixa do CLIA de Cedeira a concorrencia dalgunha ou varias das seguintes circunstancias:

- a) Baixa voluntaria por parte da persoa representante.
- b) Tras a finalización do tempo establecido para o mandato.
- c) Por falta reiterada de asistencia ás sesións de traballo.
- d) Por incumprimento do Regulamento Interno do CLIA.

A praza vacante poderá ser ocupada por outro rapaz ou rapaza do seu mesmo centro educativo.